



Broj: 13/01-05-11772/12
Sarajevo, 04.09.2012. godine

SKUPŠTINA KANTONA SARAJEVO
- O V D J E -

Poslanik Eldar Čomor na Četrnaestoj Radnoj sjednici Skupštine Kantona Sarajevo, održanoj dana 23.04.2012. godine, u okviru tačke Dnevnog reda "Poslanička pitanja, inicijative i odgovori", pokrenuo je poslaničku inicijativu:

"Da se u institucijama Kantona Sarajevo, koje se finansiraju iz budžeta i vanbudžetskih sredstava, prioritetno zapošljavaju slijepe osobe na mjestima telefoniste i fizioterapeuta.

Usvajanje i realizacija ovakve inicijative ima uporište i u Zakonu o profesionalnoj rehabilitaciji, osposobljavanju i zapošljavanju osoba sa invaliditetom u FBiH, kojim su propisani opći i posebni uslovi prilikom zapošljavanja invalidnih osoba, a članom 18. ovog Zakona utvrđen je kvotni sistem za zapošljavanje osoba sa invaliditetom, koji se odnosi i na javni i na privatni sektor."

ODGOVOR:

U članu 18. Zakona o profesionalnoj rehabilitaciji, osposobljavanju i zapošljavanju lica sa invaliditetom ("Službene novine Federacije Bosne i Hercegovine", broj: 9/10) propisano je da su prilikom zapošljavanja lica sa invaliditetom pod opštim uslovima subjekti iza člana 15. stav 2. ovog zakona dužni ta lica zapošljavati srazmjerno ukupnom broju zaposlenih u tom subjektu (npr. do 31.decembra 2012.godine najmanje jedno lice sa invaliditetom na svakih 19 zaposlenih).

Član 15. stav 2. istog zakona propisuje da se pod opštim uslovima zapošljavaju lica sa invaliditetom na otvorenom tržištu rada, u državnim organima, organima pravosuđa, organima lokalne uprave, javnim službama, ustanovama, fondovima, javnim preduzećima, privrednim društvima koja nisu osnovana za zapošljavanje osoba sa invaliditetom u skladu sa ovim zakonom. Prednost pri zapošljavanju u navedenim subjektima u okviru javnog sektora imaju lica sa invaliditetom, ako pored opštih ispunjavaju i posebne uslove za radno mjesto.

Subjekti koji ne ispune navedenu obavezu dužni su mjesečno, pri isplati plaća, obračunati i uplatiti u Fond za podsticanje rehabilitacije i zapošljavanja lica sa invaliditetom novčani iznos u visini 25% od prosječne plaće u Federaciji Bosne i Hercegovine za svako lice sa invaliditetom koje su dužni zaposliti u skladu sa navedenim propisom.

Nepoštivanje ovih odredbi smatra se prekršajem i za isti je propisana novčana kazna (član 67. istog zakona).

Nadalje, u članu 19. stav 5. istog zakona propisana je obaveza federalnom ministru nadležnom za rad i socijalnu politiku da donese propis kojim će se utvrditi radna mjesta i poslovi na kojima pri zapošljavanju lica sa invaliditetom, uz zadovoljavanje ostalih potrebnih uvjeta, prednost imaju lica sa 100% invaliditetom.

Prema Pravilniku o radnim mjestima i poslovima na kojima se pri zapošljavanju u javnom sektoru daje prednost osobama sa 100% invaliditetom ("Službene novine Federacije Bosne i Hercegovine", broj: 21/11), opštim aktom poslodavca se utvrđuju takva radna mjesta.

Slijedom ovih propisa prioritet za zapošljavanje se ne može dati jednoj grupaciji lica sa invaliditetom u odnosu na druga lica sa invaliditetom (u konkretnom slučaju prioritet slijepih osoba u odnosu na npr. lica sa invaliditetom - oboljela od paraplegije, jer u pravilu i slijepe osobe i osobe oboljele od paraplegije imaju 100% invaliditet).

Predmetna inicijativa se smatra prihvatljivom u domenu promocije Zakona o profesionalnoj rehabilitaciji, osposobljavanju i zapošljavanju lica sa invaliditetom i podzakonskih akata, te njihove potpune primjene od strane svih subjekata na koje se odnosi – javnih ustanova, javnih preduzeća, državnih institucija itd.itd.

U tom kontekstu Vlada Kantona Sarajevo će putem resornih ministara raditi na realizaciji predmetne inicijative na način da će kontinuirano promovirati potpunu primjenu svih odredbi navedenog zakona kako u ministarstvima tako i u svim institucijama čiji je osnivač Kanton Sarajevo.

S poštovanjem,

MINISTRICA

Zilha Ademaj, dipl. ecc.

Dostaviti:

1. Naslovu
2. c/o Stručna služba Vlade Kantona
3. a/a



e-mail: mrsri@mrsri.ks.gov.ba; www.ks.gov.ba
Tel: + 387 (0) 33 562-089, Fax: + 387 (0) 33 562-090
Sarajevo, Reisa Džemaludina Čauševića 1

